


中國方志叢書·華中地方·第五一號

據陳煥等修李飴等纂
民國十九年鉛印本
影印

浙江省

壽昌縣志



成文出版社有限公司印行




中國方志叢書·華中地方·第五一號

據陳煥等修李鉉等纂影印
民國十九年鉛印本

浙江省

壽昌縣志



成文出版社有限公司印行



10097751

序

民國肇造十有九年歲次庚午仲夏之月余在省府掌理軍法
桂邨李紳飪以書抵余言重修邑志創於先生並蒙捐廉爲助
今志稿將成付印在即願畀一言以弁簡端余不覺欣喜過望
回憶十六年夏奉省檄攝壽篆甫下車卽覓志書殘本遺編杳
不可得詢之父老僉謂邑志一修於明朝嘉靖間李令仰山再
修於遜清康熙間曾令文垣三修於乾隆甲戌間鍾令霖堂嗣
是以後雖經光緒間貝令蘊章黃廣文標發起重修煞費苦心
粗成稿本民國初年金令兆鵬繼貝黃遺志列爲三項要改之
一設局纂修乃一遭庚子之變擱未付刊一因金令他調無形

停頓年光荏苒時日遷延志書之失修蓋已一百七十餘年於茲矣原版早已無存完本亦難尋覓余爲之慨然者久之夫邑志者上分國史之支下匯家乘之源徵文獻考沿革備方域之志辨土物之宜所以參稽得失助治理而正人心厚風俗而維世道者胥於是在安可任其漫漶遺佚而不爲之計耶乃與邑中紳耆提議重修并先捐薄俸以爲之倡諸紳亦以修志之不容再緩也均踴余議一致贊同爰邀集各機關各紳耆開會集議商定辦法設立修志委員會於縣政府公推葉紳誥書李紳飪翁紳詩彥蔣紳宗幹葉紳泉諸葛紳信暨余七人爲委員並推李紳飪爲主任陳紳舉愷爲秘書常駐會中辦理一切而籌

劃經費則由余任之部署既定遂于十六年十月開始辦事釐訂章程斟酌體例搜求遺稿採訪逸聞分道進行井然秩然余甚樂之十七年五月奉令解篆來壽代余者則陳君士林也陳君爲余同鄉同宗且雅有世誼臨行之際眷眷以完成邑志爲託陳君亦慨然允諾曾不幾時卽以書成見告能勿快慰耶此志旣成則一百七十餘年間忠孝節義之事畧文物制度之變遷以及國體更新後之典章法度亦俱燦然羅列于其中上則爲國家正史所取材下則爲全邑家乘所會萃俾官是土者得以鏡治忽生斯土者得以知勸懲其裨益于治理人心風俗世道者蓋深且鉅也余故樂爲之序而識其緣始于此

中華民國十九年十月 日

國民政府財政部一等銀質獎章浙江省政府保安處第四
科上校科長兼法規審查委員會委員軍法會審審判官全
省剿匪指揮部軍法處處長前壽昌縣縣長浦江陳 煥謹

撰



序

夫山川奇杰之氣磅礴鬱積之所鍾必有畸士出於其間秉其貞固純潔之操以挽頑嚚頽薄之俗入水不濡入火不熱韜光斂響而无悶此其人感天地之靈淑蘊崇而發爲超卓之行固有非政教風俗所能轉移者語曰沃土之民不材瘠土之民嚮義然則地域之所繫豈細故哉間嘗聞浙東西多奇山水意必有魁傑奇偉隱逸沈淪之士欲一往遊焉而未果讀水經浙江東逕壽昌縣南自建德至此八十里中有十二瀨瀨皆峻險行旅所難縣南有孝子周大雅廬墓處則知山川之說爲不誣也民國十四年秋奉檄知壽昌縣事竊喜察其流俗訪其遺老一

償夙願焉不敢以不才辭受任一載民淳而政以簡習樸而事
易成其父老懇摯而可親其子弟謹厚而就範信乎如其山川
之勁秀矣前乎此忠義節烈者踵屬後乎此猶將敦學厲行發
揮而光大之乎匪特浙省之望抑亦海內外圭臬也壽昌之有
志舊矣自清乾隆十八年重修後今越百七十餘年矣余在任
時倡議續修以事中寢病辭卸職猶未去懷前年邑士重申此
議閱二載而事竣主其事者李君鼎丞也李君遜清選貢學識
素優凡疆域戶口人物風俗其因革損益隆替繁落之故必能
斟酌盡善翔實無遺余獨舉山川之說弁諸志端俾來者聞而
興起云爾

中華民國十九年仲秋月粵東大埔楊富臣謹序

壽昌縣志序 并頌

周禮小史掌邦國之志後之縣志蓋昉乎此夷攷壽昌爲禹貢揚州之域自唐神龍初元置屬睦州垂今千二百餘年矣其舊志自乾隆甲戌邑令鍾沛纂修後百七十餘年之間貝令金任先後倡議重修均不果行洎乎陳前任煥力申前議剏設修志會以董其成委員七人皆地方知名士也新志成體例畧變而卷帙倍之展誦之餘竊喜採訪周詳搜羅宏富惜於琳琅滿目之中以囿於經濟未得各展厥長於舊制圖籍外加以新式統計或亦斯編之遺憾也歟脫稿之年常務委員李飪君語予曰閱時二載費千五百餘金行將付梓索一言以爲序雋不文且

於壽志無毫末之功茲以樂觀厥成不揣謏陋敢爲述其崖畧
并綴俚語以頌之曰松山蒼蒼艾水湯湯登乎百籬之坪瞻乎
百歲之坊洋洋乎大同之野茫茫乎常樂之疆竹栽四境紙賽
江常煤饒西北品埒萍鄉吁嗟乎山青水秀物阜民康勝極四
靈鍾碩老於一堂會遇七賢宜邑志之重光山川奇氣錦繡文
章斯志慶成名山是藏皆中華民國十有九年之雙十節禹航
潘紹雋識

序

修史難修志尤難然縣志志一縣之事諉其難而不修可乎哉
吾壽縣志自清乾隆甲戌邑侯鍾公霖堂纂修後迄今百有七
十四年光緒庚子貝邑尊達夫黃師組雲發起重修旋遭義和
團之變事遂中輟民國六年金知事翰勛將志書列入三項要
政募款設局委蔣紳鍾翰董其事復因金公他調各區訪稿亦
未能如期送到隨又停止去夏陳味蓀先生捧檄長壽以志書
關係一邑文獻不可聽其廢而不修遂於四月間邀請士紳決
議組織委員會從事編纂且先捐廉以資提倡並公推飪爲常
務委員主持一切而以陳君子鈞襄助焉綆短汲深固辭不獲

迺陳公未二閱月旋解組去繼以今縣長蕭規曹隨積極進行其明年六月吾壽百七十四年之文獻始慶告一段落噫太史觀風亦收曹檜春秋載筆不棄邢邾蕞爾桂邨何嘗非國家領土哉況民國紀元共和肇造國體政體同時變更實開四千年來未有之創局河山猶是人物已非際此之時不起而採訪之編輯之後之人將有執其咎者且邑志倡修於今三次意外波折作輟頻仍以其數則過而以其時考之則可此次設會編纂同人殆有不得已之苦衷故明知飪不學無文競以大義相責而不許其逍遙局外也刻已脫稿縱不能上希作者而搜殘補缺煞費苦心其亦大輅椎輪之意乎爰不揣謏陋畧記其緣起

以告來許時中華民國十八年之夏節也鼎丞李飪謹誌

原序

今天下海宇清晏聲教四訖幅員之廣遠軼前軌聖天子貽萬世無疆之業特勅廷臣輯大一統志爰下徵各郡縣志以備採擇予備員壽昌於是有纂修之役顧嘗試論之一統志者大海之匯郡縣志者百川之赴也溪流澗注奔入滄溟雖尺水無波固當脈絡分明開卷了了然而難言之矣壽昌故有志前明成於吾鄉仰山李公而本朝中州章含董公續之然篇牘殘失魯魚重疊猶有遺憾且自順治癸巳以來三十年事跡未經綴續更爲缺事予自惟才乏三長兼簿書紛紜詎遑從事敬延學博士及弟子員等參互考訂一正舊帙之訛復得廣甯羅公草稿